



L Leopoldus filius fuit Alberti comitis Babenbergensis, qui ex illustri Sueuorum ducum familia suam originem habuit. Cum autem Albertus ille Conradum Francorum comitem occidisset, & ipse quoque Hattonis praesulis Moguntini astutia captus, & publica sententia condemnatus fuisset, eius familia hinc inde dissipata est. Erat autem Leopoldus insigni corporis & animi fortitudine praeditus. Itaque Henricus primus Caesar eum in Austriam ablegauit, atque eius regionis Marchionem constituit. Vngari enim perpetuis incursionibus eam regionem vastabant, atque ex ea parte Romanum Imperium mirum in modum turbabant.

Vnde Leopoldus eam provinciam fortitus, magno animo intrauit, ac contra Barbarorum irruptiones fortiter defendit. Erat tum Gyso magnae potentiae princeps, qui arcem Melicum cum oppido occuparat, quod tum Ferreum castrum uocabatur. Cum eo Leopoldus congressus, eum prostravit ac uicit. In ea arce ipse habitare coepit, atque duodecim Canonicos seculares in eius templo constituit, quos certis stipendijs exornauit, ut Deo inseruirent, atque iuuentutem eius regionis bonis literis instituerent.